

თავდასხმა კარგავს მომენტებს

თბილისი. “დინამოს” სტადიონი. ???

“დინამო” (თბილისი) - “დინამო” (მოსკოვი) 0:0.

მოსკოვი: იაშინი, კესარევი, რიაზოვი, ???, ანიჩკინი (ზობკოვი), ცარევი, ჩისლენკო, ვშივცევი, მასლოვი, კოროლენკოვი, ფადეევი.

თბილისი: კოტრიკაძე, სიჭინავა, პეტრიაშვილი, ჩოხელი, ზეინკლიშვილი, იამანიძე, მეტრეველი, დათუნაშვილი, კალოევი, მელაშვილი, მესხი.

მსაჯი ხოდინი (მინსკი).

ყოველ გათამაშებას აქვს ცენტრალური მნიშვნელობის მატჩები, რომლებსაც არა მარტო გარკვეული ცვლილებები შეაქვთ სატურნირო ცხრილის ზემო ნაწილში, იქ, სადაც ლიდერები იბრძვიან პირველი ადგილისათვის. მატჩი “დინამო” (თბილისი) - “დინამო” (მოსკოვი) იმ კატეგორიას ეკუთვნის, რომლის მიხედვითაც მსჯელობენ ჩვენი ფეხბურთის საერთო დონეზე, მის მდგომარეობაზე, პერსპექტივაზე. ყველაფერს რომ თავი დავანებოთ, თამაშში მონაწილეობდა სსრ კავშირის ნაკრები გუნდის ათიოდე მოთამაშე, ეს ფაქტი კი თავისთავად მეტყველებს გუშინდელი მატჩის უაღრესად დიდ სერიოზულობაზე.

ბუნებრივია, რომ ასეთ სიტუაციაში სპორტსმენი ყოველთვის განიცდის სასტარტო მღელვარებას, ნერვიულობას, გარკვეულ პერიოდში ვერ პოულობს მოქმედებათა სწორ გადაწყვეტას და ხშირად უშვებს შეცდომებს, რომლებიც სხვა შემთხვევაში მისთვის დამახასიათებელი არაა. ამ თავისებურ ფსიქოლოგიურ ბრძოლაში, რომელიც წინ უძღოდა მატჩს, მოსკოველებს შესამჩნევი უპირატესობა ჰქონდათ: მათი საბრძოლო შემადგენლობა სრული კომპლექტით იყო წარმოდგენილი, ხოლო თბილისელებს საგრძნობი დანაკლისი ჰქონდათ ვ. ბარქაიასი და მ. ხურცილავას სახით. ორი ასეთი მოთამაშის სრული დუბლირება დანაკარგის გარეშე ძალზე ძნელი საქმეა.

და მიუხედავად ამისა, პირველი შეტევები მასპინძლებმა წამოიწყეს. იამანიძე კარგად ასრულებდა აგრესიული ნახევარმცველის ფუნქციებს და მესხთან ერთად განუწყვეტლივ არღვევდა “ბეტონის” სიმაგრეებს მოწინააღმდეგის დაცვის მარჯვენა ფლანგზე. მე-6 წუთისათვის მესხს უკვე ორი კორნერი ჰქონდა მოწოდებული, ხოლო მე-8 წუთზე მან კიდევ ერთხელ დასტოვა ზურგს უკან კესარევი და ზედ კარის წინ მიაწოდა ბურთი კალოევს. ეს იყო მესხისა და კალოევის ტიპიური კომბინაცია, რომლის გათამაშებისას იაშინი წამით შეფერხდა და საშუალება მისცა ცენტრალურ თავდამსხმელს მიეღო თავით ბურთი. მაგრამ დარტყმა არ გამოდგა ზუსტი. იაშინის კარი გადარჩა გოლს.

გავიდა ერთი წუთი და აღნიშნულ მომენტზე კიდევ უფრო სახიფათო ვითარებაში აღმოჩნდა თბილისელთა კარი. მოწინააღმდეგემ სწრაფი გადაადგილებანი მოახდინა თავდასხმაში, მარცხენა ფრთაზე გაითამაშა კომბინაცია და მოულოდნელად გადაიყვანა ბურთი მარჯვნივ, სადაც ერთმანეთის პირისპირ აღმოჩნდა ორი მოთამაშე: მეკარე კოტრიკაძე და გარემარბი ფადეევი ბურთით ფეხში. ეს იყო მეკარისა და ფორვარდის წამიერი დუელი, რომელიც მოიგო კოტრიკაძის შესანიშნავმა რეაქციამ. თითქმის ასპროცენტიათი გოლი ლიკვიდირებულ იქნა.

თბილისელთა აქტიური შეტევები დაახლოებით 15 წუთს გაგრძელდა და ძნელი სათქმელია რა ხასიათი ექნებოდა ტაიმის შემდგომ მსვლელობას, რომ შეტევის წარმოებისას მარჯვენა ფლანგი არ ჩამორჩენოდა მარცხენას. მეტრეველი და

მელაშვილი ხშირად იცვლიდნენ ადგილებს ერთმანეთს შორის და ამ მონაცვლეობაში იკარგებოდა ჩვენი შესანიშნავი მარჯვენა გარემარბის თამაშის კონკრეტული უპირატესობანი. ფლანგი - მეტრეველის ნამდვილი სტიქიაა.

მოსკოველთა დაცვა მოქმედებდა უდიდესი დატვირთვით, მაგრამ ძალზე საიმედოდ, კოლექტიურად. ძნელია რომელიმე მცველს დააკარგინო წონასწორობა და დაატოვებინო ზონა, მითუმეტეს, რომ მას სისტემატურად ესმის ზურგიდან გამოცდილი მეკარის - იაშინის განკარგულება. როგორც კი რომელიმე თბილისელი იწყებდა გასვლას თავისუფალ ადგილზე, იაშინი წამსვე აძლევდა მითითებას მცველებს და საჭირო დისლოკაცია მათ შორის აღდგენილი იყო.

მე-20 წუთისათვის თამაში გათანაბრდა, ხოლო ცოტა ხანს შემდეგ ინიციატივა უკვე მოსკოველებს ჰქონდათ, თუმცა ისინი ხანგრძლივ იერიშს არ აწარმოებდნენ და მოკლე, სწრაფი და მოულოდნელი გარღვევებით ახორციელებდნენ თავიანთ შტურმს. ორჯერ აღმოჩნდა საუკეთესო პოზიციაში ჩისლენკო და ორჯერვე მისმა დარტყმამ ვერ მიაღწია მიზნას.

მეორე ტაიმში მოსკოველებმა ანიჩკინის ნაცვლად მინდორზე გამოიყვანეს ბობკოვი. ბობკოვი თავდამხმელია და უნდა ვიფიქროთ, რომ გუნდის ხელმძღვანელობას ვარაუდი ჰქონდა ტაიმი მოგების გზით წაეყვანა. მაგრამ ბობკოვი არავის უნახავს თბილისელთა საჯარიმო მოედანზე შემოსული. იგი კოროლენკოვთან ერთად ღრმა ზურგში იყო დაწეული და ორივენი მთელი თავიანთი შესაძლებლობებით ეხმარებოდნენ დაცვას, რათა როგორმე შეენარჩუნებინათ იაშინის კარის ხელუხლებლობა.

თბილისელებმა საუკეთესოდ ჩაატარეს მეორე ტაიმი. თითქმის 15-20 წუთის განმავლობაში მოსკოველთა განთქმული დაცვა დეზორგანიზაციისა და პანიკის პირამდე იყო მისული. ყველაფერი კარის ხსნისათვის - ამ ლოზუნგით თამაშობდა გუნდი, რისთვისაც მან დაიხმარია ნახევარმცველებიც და ფორვარდებიც. მასპინძლები სწრაფად გადიოდნენ მინდვრის შუაგულს, ზუსტად გადაჰყავდათ ბურთი ფლანგიდან ფლანგზე და შემდეგ ცენტრში, სადაც პარტნიორებმა მელაშვილს მრავალი შესაძლებლობა შეუქმნეს კარში დარტყმისათვის, მაგრამ, არც ერთი მათგანი არ იყო ისეთი, რომ იაშინს მიწაზე დაცემა დასჭირვებოდა. ეს იყო ბომბარდირება... ფუჭი ვაზნებით. მართალია, ძალზე კარგი შესაძლებლობა ჰქონდა ვშივცევსაც, მაგრამ ეს იყო ეპიზოდი, ხოლო მოსკოველთა კარი ხანგრძლივად იმყოფებოდა შეუწელებელი იერიშის წინაშე. რად ღირს თუნდაც მე-14 წუთი, როცა მესხმა მიიღო კალოევის გადაცემა, გაუსწრო კესარევს და სრულ მარტოობაში დარჩა იაშინთან. მოსკოველთა მეკარე ამ მომენტში აღარ იდგა თავის პოსტზე, იგი წინ იყო გამოსული და როცა მესხმა კარში დაარტყა, იაშინი ისეთივე მაყურებელი იყო, როგორც ჩვენ ყველანი, სტადიონზე დამსწრენი. იაშინიც ისევე შორიდან უყურებდა ბურთს, თუ როგორ მიგორდა იგი კართან და... გასცდა ძელს მინდვრის ფარგლებს გარეთ.

დადგა ცაიტნოტი. თბილისელები ჩქარობდნენ, მაგრამ ამ დროისათვის მოსკოველებს უკვე კვლავ მოწესრიგებული ჰქონდათ ურთიერთმოქმედება საჯარიმო მოედანზე. გოლი, რომელთანაც რამდენიმეჯერ ასე ახლოს იდგა ჩვენი გუნდი, მაინც არ იქნა გატანილი: 0:0.

ა. ზაზროშვილი, სპორტის დამსახურებული ოსტატი; ბ. ქორქია.
“ლელო”, 14 ივლისი, 1963 წ.